

# VITOUULA

## Livalela bububula

**1** <sup>1</sup>Kala vitouula tuta matutona Yaubada ibubuli vavagi komwaidona walakaiwa deli watanawa, <sup>2</sup>e baisa ovalu watanawa gala avai vavagi isisu. Paila komwaidona vilouwokuva wala, e gala kwaitala avai migila isisu ambaisa ambaisa. Mesinaku bolitawokuva wala isisu, saina vakaigaga milaveta ikuboli

vavagi komwaidona, e dubilikitakita wala isisu. Mitaga Yaubada la peula myala <sup>a</sup> ititavina ambaisa ambaisa odabala sopi. <sup>3</sup>Yaubada ikaibiga, kawala, “Ibodi tuta baisa lumalama bikaloubusi.” E lumalama ikaloubusi, <sup>4</sup>e Yaubada saina iyomwasali nanola avaka bogwa leigisi. Mapaila Yaubada ikelituli lumalama, itavilevi lumalama metoya dudubila. <sup>5</sup>E Yaubada lumalama idoki

<sup>a</sup> *Yaubada la peula myala*: Mabigana gagabila bitagini “bilomala Yaubada”, kaina “yagila metoya baisa Yaubada”, kaina “utuyagila saina kwaitabwabogwa”. Mina Iberu si biga paila baloma, yagila deli yagisa kwaitala wala.

1.3 2 Kr 4.6

yagala Yam, dudubila yagala bogi. E bogwa leibogi, eiyam kaukawau, baisa Yam kwaitala.<sup>b</sup>

<sup>6-7</sup> E Yaubada ikaibiga, kawala, "Ibodi basaili avaka bitavilevi sopi, c e kaitala kabosilaboda makawala kailuya kaiveka, kidamwa sopi kabala ituwoli ituwoli bisisu." E bogwa ikaloubusi makawala. Yaubada isaili kabosilaboda makawala kailuya kaiveka, e itavilevi sopi watanawa e walakaiwa. <sup>8</sup> E kabosilaboda makaina idoki yagala labuma, e bogwa leibogi, eiyam kaukawau, baisa Yam kwaitiywala.

<sup>9</sup> E Yaubada ikaibiga, kawala, "Ibodi sopi watanawa bitabai bititayelu bila ambaisa okabala, e pwaipwaia biyoulupa." E bogwa ikaloubusi makawala. <sup>10</sup> E pwaipwaia idoki yagala Valu Watanawa. E sopi leila isisu okabala idoki yagala Milaveta. E Yaubada saina iyomwasali nanola avaka bogwa leigisi. <sup>11</sup> E Yaubada ikaibiga, kawala, "Ibodi kai kasi gigisa migawelu migawelu bisusinasi ovalu watanawa - makaisina takamkoma, avaka avaka biuwasi isim waitunesi, e avaka avaka biuwasi isim kawaiiuwasi." E bogwa ikaloubusisi makawala. <sup>12</sup> E mapaila valu watanawa isusinasi kai kasi gigisa migawelu migawelu, e Yaubada saina iyomwasali nanola avaka bogwa leigisi. <sup>13</sup> E bogwa leibogi, eiyam kaukawau, baisa Yam kwaitolula.

<sup>14</sup> E Yaubada ikaibiga, kawala, "Ibodi kaitapa wa labuma bikelilitu Yam deli bogi, e deli bikibuboti kala Yam taitu, kabosigugula e deli kweluvula paka kala tutu. <sup>15</sup> E bikatasi metoya wa labuma, paila bisimalti valu watanawa." E bogwa ikaloubusi makawala. <sup>16</sup> E Yaubada ibubuli kaiyu kaitapa kai-vakaveka, kalasia bikaraiwaga otutala Yam, e tubukona bikaraiwaga otutala

bogi. E tuvaila ibubuli utuyam. <sup>17</sup> Oluvi isaili kaitapa makaisina wa labuma paila bisimalti valu watanawa, <sup>18</sup> paila bikaraiwagasi tutala wa Yam wa bogi, e deli bitavilevi metoya lumalama deli dudubila. E Yaubada saina iyomwasali nanola avaka bogwa leigisi. <sup>19</sup> E bogwa leibogi, eiyam kaukawau, baisa Yam kwaitasila.

<sup>20</sup> E Yaubada ikaibiga, kawala, "Ibodi sopi bikasewoki tommomova migawelu migawelu, e deli gawata bikasewoki mauna nayoyowa." <sup>21</sup> E Yaubada ibubuli mimilisi dokanikani, e maunela bolita kasi gigisa migawelu migawelu, e deli mauna nayoyowa kasi gigisa migawelu migawelu. E Yaubada saina iyomwasali nanola avaka bogwa leigisi. <sup>22</sup> Ikabwaili minasina komwaidona, e iluki minasina isisuausi obolita kidamwa biunigeyaisi bimiliaki bolita. E iluki mauna nayoyowa biunigeyaisi bimiliaki valu. <sup>23</sup> E bogwa leibogi, eiyam kaukawau, baisa Yam kwaitimala.

<sup>24</sup> E Yaubada ikaibiga, kawala, "Ibodi maunela odabala pwaipwaia kasi gigisa migawelu migawelu bikaloubusisi, nabubolodila deli nabulutuvalu, navakeva deli nakikekit." E bogwa ikaloubusi makawala. <sup>25</sup> E bogwa Yaubada ibubuli komwaidona, e saina iyomwasali nanola avaka bogwa leigisi.

<sup>26</sup> E Yaubada ikaibiga, kawala, "Baisa tuta bitabubulaisi tomota matausina igau migisi kasi gigisa deli goli kasi bububula komwaidona makawala wala yakidasi. <sup>d</sup> Matausina bikaraiwogaisi yena, mauna nayoyowa deli goli mauna komwaidona nabulutuvalu deli nabubolodila, navakaveka deli nakikekit." <sup>27</sup> E mapaila Yaubada ibubuli tomota e migisi kasi gigisa makawala matauna kala gigisa. Ibubuli tau deli vivila. <sup>28</sup> Ikabwaili matausina e ikaibiga,

<sup>b</sup> Idokaisi kwaitala Yam kala vitouula tatoula wala kalasia bisalili, e Yam makwaina biwokuva nabwaia avai tuta kalasia siviyuwela bisalili. <sup>c</sup> Mina Iberu idokaisi Yam watanawa isisu olumoulela bolita. Bolita walakaiwa odabala labuma bivigaki bikuna, deli bolita watanawa osikowala pwaipwaia bivigaki dadoya. Kugisi kaikobu mapilana kala katumiki Vit 7.11. <sup>d</sup> Gala tanikoli avaka uula Yaubada eikaibiga *yakidas*. Mimilisi idokaisi ibudoki taitala guyau bililava makawala paila titouleta, mimilisi idokaisi Yaubada ililivala paila budotala boda matausina mina labuma; kugisi Vit 3.22; Yobi 1.6.

kawala, "Ibodi litumia bidalasi kidamwa biunigeyaisi tubumia, e bitokwabitamsi paila valu watanawa kala kaisisu. Bavigakaimi bukutokwaraiwagasi paila yena, mauna nayoyowa, deli goli komwaidona maunela lawodila.<sup>29</sup> Bogwa lasaili avaka avaka isim waitunesi deli avaka avaka isim kawaiulwas, paila bukukwamkwamsi.<sup>30</sup> Pailaga mauna nabubolodila deli mauna nayoyowa bogwa lasaili mnemonu deli kai yekwesisi paila bikamkwamsi." E bogwa ikaloubusi makawala.<sup>31</sup> Yaubada igisi komwaidona avaka bogwa ibubuli e saina iyomwasali nanola. E bogwa eibogi, eiyam kaukwau, baisa yam kwallima kwaitala.

**2** <sup>1</sup>E mapaila Yaubada ivigimkulovi kala bububula vavagi komwaidona walakaiwa deli watanawa.<sup>2</sup> E kwallima kawaiuwela yam Yaubada eivinaku la bububula komwaidona baisa avaka leiu-vagi, e ivaiwasiga paisewa.<sup>3</sup> E bogwa ikabwaili yam kwallima kawaiuwela e ikatupaliga makwaina yam kwaiveka paila matutownena leivigimkulovi bububula, e ivaiwas.<sup>4</sup> Baisa makawala goli leivigaki leibubuli walakaiwa deli watanawa ambaisa ambaisa vavagi komwaidona.

### Buyagu makubilana Ideni

Tutala Guyau Yaubada <sup>e</sup> ibubuli vavagi komwaidona walakaiwa deli watanawa,<sup>5</sup> e gala avai kai isisu odabalwa pwaipwaia. Paila uula Yaubada gala wala biwitali kuna, e tuvaila gala availa bibiguli makwaina pwaipwaia.<sup>6</sup> Mitaga sopi biluludolu metoya olumoulela pwaipwaia biyopututu.

<sup>7</sup>E Guyau Yaubada iyeili sitana pwaipwaia metoya opwaipwaia e ivigaki taitala tau.<sup>f</sup> E ikayoki yagisa deli momova okabulula, e matauna tau ivitouula la momova.

<sup>8</sup>E Guyau Yaubada ibiguli buyagu makubilana Ideni opilibomat, e baisa

isaili matauwena tau leibubuli.<sup>9</sup> E Guyau Yaubada ivali kai kaiminibwaita kasi gigisa migawelu migawelu isusinasi iuwas i kawaiulwa bwaina sainela. E oluwalela makwaina bagula kaiyu kai itotusi, kaitala makaina kaila momova, e kaiyuwela makaiwena uulela kabitam paila vavagi bwaina deli vavagi gaga.<sup>g</sup>

<sup>10</sup>E sakala ititayelu olopola Ideni, e ivinumli bagula makwaina. Metoya baisa Ideni ikatuvi ivigaki waya kaduyovasi.<sup>11</sup> Kaduyomatala waya makaduyona yagala Pisoni, ititayelu olopola mapilana valu Abila.<sup>12</sup> (Goula kwevivivila ikanaiki baisa, e bulami maiina saina simasimina, deli dakuna kwevakivila mwau mipusi.)<sup>13</sup> Kaduyuwela waya yagala Gioni ititayelu olopola mapilana valu Kusa.<sup>14</sup> Kaduyotolula waya yagala Tegirisi, makaduyona ititayelu mapilana Asiria opilibomat. E kaduyovasila waya makaduyona Yupiteriti.

<sup>15</sup>E Guyau Yaubada isaili tau matauna olopola buyagu Ideni paila bibiguli deli biyamati.<sup>16</sup> E Guyau Yaubada iluki matauna, kawala, "Ibodaim bukukoma kai kaiuwala komwaidona olopola bagulla,<sup>17</sup> mesinaku wala makaina kai uulela kabitam paila vavagi bwaina deli vavagi gaga. Gala ibodi bukukoma kaiuwala kai makaina. Kidama bukukoma, yam makwaina wala bukukwalia.

<sup>18</sup>E Guyau Yaubada ikaibiga, kawala, "Ka, gala avaka kala bwaina tau matauna kalamwaleta wala bisisu. Bogwa babubuli taitala lubaila kidamwa bipilasi matauna."<sup>19</sup> Mapaila iyeili sitana pwaipwaia metoya opwaipwaia, e ivigaki mauna nasigasagina deli nayoyowa kasi gigisa migawelu migawelu. E imai minasina bimaisi omatala tau kidamwa bisaiki igasi. E makawala goli komwaidona minasina isim wala igasi.<sup>20</sup> Matauna tau bisaiki igasi

<sup>e</sup> Avai tua mina Iberu ikavitagaisi Yaubada yagala, baisa Yahweh, yakidisi taginisi maigana Guyau. (Mimilisi buki pilabogwa biginisi Yeoba.) <sup>f</sup>pwaipwaia...tau: Mina Iberu si biga paila pwaipwaia (adam) deli tau (adamat) kala lega makawala wala. <sup>g</sup>kabitam paila vavagi bwaina deli vavagi gaga: Gagabila bitagini "kabitam paila vavagi komwaidona."

komwaidona mauna<sup>h</sup> nayoyowa deli nasigasagina. Mitaga gala goli natana minasina isisu bisaiki lubaila kidamwa bipilasi matauna.

<sup>21</sup> E oluvi Guyau Yaubada ikaraiwogi matauna tau bimisiwoya sainela. Tutala immasisi, e Guyau Yaubada ikisasi visiala kaitala e oluvi iluvisosuvau wowola matauwena. <sup>22</sup> Ikau visiala ivigaki natana vivila e ivakouli minana imiaki matauna. <sup>23</sup> E tau matauna ikaibiga, kawala,

“Ka, bogwa labani taitala migima  
migitinidesi wala.

Totuanela metoya ototuwanege, e  
vilionala metoya ovilionege.”

Bogwa ladoki minana yagala

“Vivila” paila uula eisunapula  
metoya baisa tau.<sup>i</sup>

<sup>24</sup> Baisa uula tau bisilavi tamala inala, bivakouli la kwava, e kasitaiyu bivigakaisi uwosi makawala taitala.

<sup>25</sup> E kasitaiyu wala tau sola vivila tokikimwadu wala, mitaga gala wala immosilasi.

### Tomota si kowolova

**3** <sup>1</sup>E baisa tuta minana keiyuna saina saina nakabitam mitaga la katuduvidavi saina ikalisuwoli mauna komwaidona avaka Guyau Yaubada ibubuli. E keiyuna ikatupoi minana vivila, kawala, “Ve! Ki - mokwitala Yaubada eilukwaimi gala bukukwamsi kawailuwala kaitala kai metoya olopolo bagula?”

<sup>2</sup> E minana ivitakaula, kawala, “Ibodi bakakoma avai kai avai kai kaiuwasi olopolo bagula makwaina. <sup>3</sup> Mesinaku wala makaina kai oluwalela bagula Yaubada ilukwaimi galaga bakakoma kaiuwala makaina, kaina bakakabikoni. Kidamwa bakavagi makawala, e igau bakakaliga kamataiyu.”

<sup>4</sup> Keiyuna ikaibiga, kawala, “Ve! Mabigana biga gala mokwita, gala wala bukukwaligasi. <sup>5</sup> Yaubada ilivala baisa uula inikoli tuta matutona bukukomasi

yokomi makawala wala Yaubada, paila bukunikolaisi vavagi bwaina deli vavagi gaga.”<sup>j</sup>

<sup>6</sup> Vivila igisi kai makaina saina kaiminabwaita, deli idoki kawailuwala kala kamkwam bwaina, e magila wala bibani kabitam. Mapaila minana ikau mimilisi ikoma. Oluvi isaiki la mwala, e deli ikam. <sup>7</sup> Tutala eikamsi iwokuva, e itapuloki niasi, e ikatetasi kidamwa tokikimwadu matausina. E mapaila ikauwaisi yekwesila kai ibisitukwaisi e isikamsi.

<sup>8</sup> Koyavi makwaina ilagaisi Guyau Yaubada ililoula olumoulela bagula, e mapaila isipepunisi metoya omatala matauna oyalela kai. <sup>9</sup> Mitaga Guyau Yaubada idou matauna tau, kawala, “Mwa! Ambaisa youku?”

<sup>10</sup> Ivitakauloki, kawala, “Alagaim olumoulela bagula, e agu kokola asipepuni metoya baisa youku, paila yeigai tokimwadu wala.”

<sup>11</sup> E Yaubada ikatupoi, kawala, “Availa ilukwaimi baisa lokukikimwadusi? Ki, kukomasi makwaina kawailuwa, makwaina lalukwaimi gala bukukomasi?”

<sup>h</sup> Metoya baisa tanikoli tau isim la karaiwaga odubasi mauna komwaidona. <sup>i</sup>vivila...tau: Mina Iberu si biga paila tau (ish) deli vivila (ishah) kala lega makawala wala. <sup>j</sup>vavagi bwaina deli vavagi gaga: Gagabila bitagini “vavagi komwaidona”.

<sup>12</sup>E matauna ivitakauloki, kawala, “Minawenala vivila bogwa lokusaili kamataiyu, e minawena leisakaigu kawailuwa makwaina, e lakoma.”

<sup>13</sup>E Guyau Yaubada ikatupoi minana, kawala, “Avaka paila lokuvagi baisa?” E minana ivitakauloki, kawala, “Keiyuna isipulokaigu e akoma.”

### Yaubada ikamogi

<sup>14</sup>E Guyau Yaubada iluki minana keiyuna, kawala, “Youku bukubani mipuki paila baisa. Youku wala komwaidona oluwaisi mauna komwaidosi bukubani makwaina mipuki. Lagaila e tuta komwaidona bukusigisagina metoya olopom e deli bukukwamkwam tubumyou tuta komwaidona avai tuta m momova isisu. <sup>15</sup>E bavigakaimi youku deli vivila tilaula bisisu oluwaimi. Vivila dalela deli youku dalem komwaidosi bitilaulasi. Vivila dalela bikatumkumku pwanetam, e youku bukugadi kaigadula kaikesi.”

<sup>16</sup>E iluki vivila, kawala, “Igau bakatumkulovi kam mwau bila om susuma, e kam mmayuyu avai tuta m valu. Ilagoli tuta tuta bukunanamsa peula paila m mwala, mitaga matauna kam todabala.”

<sup>17</sup>E iluki tau, kawala, “Ki, youku bogwa lokunakaigali m kwava la biga, e lokukoma makwaina kawailuwa. E makwaiwena lalukwaim gala bukukoma baisa tuta. Paila baisa avaka bogwa lokuvagi e pwaipwaia bogwa bivigaki mwau baisa youku. Tuta oluvi buku-paisewa peula paila m kwaisisu, e bukubagula titoulem kám e bukukwam.

<sup>18</sup>Paila bogwa mnemonon gaga deli kaitasulisa toyo kaigunigwaini bisusinasi, deli youku bogwa kanipugwa kalagila bukukwam. <sup>19</sup>E igau youku buku-paisewa peula bipolu kam kwapololu. Bukubiguli avaka avaka kam kawailuwa, tatoula wala bukukwaimilavau

opwaipwaia baisa labubulaim. E youku bogwa labubulaim metoya opwaipwaia e igau bukumila pwaipwaia tuvaila.”

<sup>20</sup>E Adam idoki yagala la kwava Ibi. <sup>k</sup> Paila minawena tomota komwaidona mina watanawa inasi. <sup>21</sup>E Guyau Yaubada ivigaki kasi kakapula Adam sola la kwava metoya mauna kanuvinesi, e ivisikoma matausina.

### Yaubada iyabi Adam isilavi makubilana

<sup>22</sup>E Guyau Yaubada ikaibiga, kawala, “Tuta baisa tau matauna makawala wala yakidasi, e itapuloki nanola paila avaka bwaina deli avaka gaga. Galaga batagwala bikam kaiuwala metoya makaina kaila momova. Paila kidawma bikoma, la momova bogwa bikanuvagasi.” <sup>23</sup>Mapaila Guyau Yaubada iyabi matauna isilavi makubilana Ideni, ivigaki matauna bibiguli pwaipwaia makwaina, ambaisa goli Yaubada eibubuli matauna. <sup>24</sup>E mapilana opilibomatua bagula otokwedala Yaubada isaili mimili si tommomova, <sup>l</sup> deli kavitalla puluta kavilululu makavina tuta komwaidona bititavina ambaisa ambaisa wala. E baisa kala silaboda gala availa bimakaiia katitaikinela makaina kaila momova.

Text : © Bible Society of Papua New Guinea 1997

ISBN 9980 63 765 X

SB053P

NT first published	1984	2,100
NT reprint	1988	1,000
NT reprint	1993	500
Shorter OT, revised NT	1997	5,000

<sup>k</sup> Maigana Adam kala katumiki “mina watanawa”, e maigana Ibi kala katumiki “nammomova”. <sup>l</sup> Minasina mina labuma goli, idokaisi isim pinupanesi bidubadu deli migisi migawelu (kugisi Isi 1.5-12). E minasina goli ikibuboti Yaubada matauna Toguyugwayu deli Topeuligaga. <sup>m</sup> Maigana Keni kala lega makawala mina Iberu si biga “leibani”.